

Ufficio Stampa della Provincia autonoma di Trento

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

COMUNICATO n. 2377 del 02/09/2025

Fugatti: "Gem de moglechkait en de doin platz za meing hom strukturn as sai' aktraktiv ver de turistn"

S vòngen u' drai naia òrbetn en Palai en Bersntol as vour sai' en programm ver de schea'nekait van derver van Pnrr

[Mòcheno] Van aupaun van an nain kiosk as gip an dinst en de vil bònderer as gea' as de pèrng en bider zan plòtz leing de boan inngabòcksn van bòlt, pet an pèrg ont an agritur as verpersern de dinstn, gem naia moglechkaitn en de jungen ont en de lokaln bèrkn ont bider bèrt gem en derhòltn ont bider ausrichtn va de lòntschòft. S vòngen u' en de Gamoa' va Palai en Bersntol drai naiaòrbetn gèltsgott en programm "Schea'nekaitn van derver" van Pnrr, pet en rif za gem bèrt en de balschn storische derver turch a kultural vernaier ont understitz en de lokaln iniziativn. S ibergem van òrbetn ist kemmen gatu' en mitta as de 27 van agest, bail an trèff organisart asn lònt vour der president va de autonome Provinz va Trea't, Maurizio Fugatti, der pirgermoaster va Palai en Bersntol, Franco Moar, der vicepirgermoaster, Adolfo Toller, der president va de Tolgamoa'schòft Hoa Valzegu' ont Bersntol, Andrea Fontanari, ont van lokal autoritet.

"Palai en Bersntol ist de Gamoa' as s ist kemmen tscherlt va de Provinz ver za meing aribarn en zil vourtrong van Minister va de kultur ver za mòchen bider lem a lòntschòft ver an iata region ont autonome provinz. Hait klòff ber van a sait va gèltunterstitzn ver za verzinsn ont ver za gem aus za èssn, va de ònder sait sèll as keart en auziglñ ont en en pauerhof, ver za gem de moglechkait en de doin platz za meing hom de peistn strukturn ver de turistn. En doi leing se derzua òndra zuazoln ver de infrastrukturn ont ont ver de bersntoler kultur, de sprochminderhait as toalmòcht va de gschicht va de inser autonomi van Trentin", hòt derklort bail s ibergem van òrbetn der president Fugatti.

Genau, de earste òrbet ist de sèll za paun au a struktur ver za verkaven trinkzaig ont èsszaig, zòmm pet an informativpunkt, birt ont bèrt gem en gònze parkplòtz kan Vròtt, ver ungefèr an kost va an milion va euro.

"S keart se - hòt derklort der pirgermoaster Moar - va bichtega òrbetn ver de inser Gamoà', ver de inser provinz, ont ver òlla de turistn as bail de rifboch villn de insert pèrgplatz. S kimm verpersert an dinst as ber schoa' hom, der parkplòtz, ber barn semm leing an kloa'n kiosk, pet òllgamoà' keirecher ont techniker zimmerler ont an dinstn. Òlls bart kemmen garift pet informativplakatn ont platz as de lokal bèrkn barn meing prauchen, abia as schoa' ist iaz bail der summer. De òrbet ist zuazolt van Pnrr ont hòt noat gahòt va longa derlabzaitn. Iaz gea' envire de bèrkn van lòn, as barn gem lem en en projekt u'pfònk ver za verpersern der sias turismus van Bersntol".

De òndern zboa òrbetn, as sai' s aupaun van an stòll pet ungefèr zboa'sk vicher (ver 1,4 milionen va euro) ont an pahalter ver za mòchen an agritur (ver ungefèr 1,1 milionen va euro), barn kemmen gamòcht en Fikareim, ungefèr as 1700 metre va heachekait. De zboa strukturn barn kemmen ibergem, asou as kimm bider lem gem en plòtz, vouraus praucht ver za boan.

"En doi plòtz - hòt derklort der vicepirgermoaster Toller - pin e kemmen benn as e kloa' gaben pin pet de kia. Òll familia van plòtz en de visker jor ist do kemmen en de vria pet de sai'na kia. Hait laider de kia sai' runt bea'ne ont sechen der doi plòtz lar ont inngabòcks van bòlt hòt mer gamòcht zòmmdrucken s hèrz. Iaz pet de doin projektn hoff ber za mòchen bider lem der doi plòtz ver de jungen, ont asou bider guat sai' za hearn de schèlln van kia".

Ver en president va de Tolgamoà'schòft, Fontanari, de òrbetn hom "vour gahòt an untersuach van projekt ont abia as der u'nimm se u' pet de lòntschòft". "De doin òrbetn - sai' strategisch ober de miasn hom a rèchta òcht en de umbèlt as de miasn drinn gea'. Abia lònplan kommission ont Zentral schòff ver de ibergeb va de Tolgamoà'schòft sai ber guat gaben za gem gahasega ompòrt ont hait konn men schoa' sechen sèll as hòt trong, pet en u'vòng van òrbetn. S doi ist moglech gaben gèltsgott en a zòmòrbet zbischn de lokaldinstn, Tolgamoà'schòft ont Provinz, pet an guatn rif ver de gònze gamoà'schòft".

En [doi link](#) ist moglech oarnemmen der service video.

Ibersetz gamòcht van Sprochtirl va de Tolgamoà'schòft Hoa Valzegu' ont Bersntol

https://www.youtube.com/watch?v=_A4-T-QWBI8

<https://www.youtube.com/watch?v=0FTlfhRnfOU>

https://www.youtube.com/watch?v=ZJw1V70U_dk

<https://www.youtube.com/watch?v=30P-Jrndz30>

(cdt)